

Dadka Albinos-ka loo yaqaan oo Noqdey Dil Sugayaal



Maqaalkaan inaan qoro waxaa igu qasbay markaan dareemay in dadka loo yaqaano Albinos-ka ee ku nool East **Africa** ay soo wajahday xaalad aad u adag kadib ,iyadoo dadkaan markii hore ay ahaayeen kuwo dhibaato qaba loogu siyaadiyey dhibaato kale oo ay abuureen qaar ka mid ah bulshada ku nool wadamada East **Africa** iyagoo bilaabay in dadkaasi ay ula dhaqmaan si aad u xun oo ka baxsan bini'aadannimada. Dadka Albinos-ka waa dad jirkoodu uu doorsoomay kana tirmay midabkii lagu yaqiinay dadka kale waxaana asiibay cudur ay ku dhashaan oo ka

soo bilowday inta ay ku jiraan uurka, inta badan dadku ma ogaan karaan qofku inta uu yar yahay, waxayse u qaataan in uu yahay qof cad oo keliya, waxaase la ogaada marka uu yara koro, waxa uuna cudurkaan haatan ku badan yahay wadamada East **Africa** oo ay ka mid yihiin Tanzania, Kenya, Uganda, Burundi

hase yeeshee Soomaaliya dadkaasi way ku yar yihiin, balse dad ayaa qaba in dadka midabkaasi leh ay yihiin dad Juudaan qaba, waxaase xaqiiqo ah in aysan ahayen dad Juudaan qaba balse waa cudur ay ku dhasheen oo midabka qof dila.



Wadamadaas aan kor ku soo sheegnay dadka ku nool ee cudurkaan qaba waxay sameysteen ururo ay ku raadsadaan xaquuqdooda maadaama ay soo

wajahday dhibaato kale oo la xiriira dhinaca Quraafaadka iyo Sixirka, waxaana dhawaan nin u dhashay dalka Kenya maxkamad ku taala Wadanka Tanzania ku xukuntay 8 sano oo xarig ah iyo in uu bixiyo lacag dhan 50 –kun oo doolar, markii la ogaaday in uu dalka Kenya ka Masaafuriyey nin ka mid ah dadka Albinos-ka ah kadib markii uu u sheegay in uu shaqo uga soo helay dalka Tanzania, hase yeeshee arrintu sidaas ma aysan noqon waxaana la ogaaday in

ninkaasi Albinos-ka laga iibin rabay kooxo adeegsada Sixirka oo uu ninka Kenyaantiga ah doonayey in uu ka siisto lacag dhan 250 kun oo Doolar waxayna Kooxda sixirooleyda ah doonayeen in ay ninka Albinos-ka ah jarjaraan ay ka iibiyaan dad kale oo aamisan in hilibka albinos-ka ah hadday cunaan ay helayaan fursado Shaqo iyo lacag fara badan. sidoo kale waxaa hilibka dadka Albinoka ah qaata dadka uu jaceylku dhex maro oo u isticmaala in qof wax jecel uu ku soo jiito qofka uu jeclaaday haddii uusan jecleyn,. Ninka Kenyaatiga ah ee ay Maxkamaddu xukuntay ayaa qirtay arrintaasi in uu sameeyey , isagoo sheegay in ay jiraan dadyow kale oo ku hawlan Mashruucda noocaan oo kale ah



Dhawaan ahayd markii Ciidanka Booliiska ee Dalka Tansaaniya ay weerar ku qaadeen Guri ku yaala Caasimada Dalkaas ee Daara-Salaam waxa la yaab noqotey in Guriga loogu tagey Hilbo Jarjaran oo la sheegey in uu ahaa wiilo dhalinyaro ah oo ka mid ah dadka Albinos-ka ee ku nool dalka Tansaaniya waxaas halkaa laga waayey dadkii Mashruucaas ku jirey waxayna arrimtaan la yaab ku noqotey dadka reer Tansaaniya gaar ahaan dadka ka soo horjeeda dhibaatooyinka loo geysanayo dadkaas iyadoo dadka loo yaqaan Albinos-ka ee ku nool wadamada East **Africa** ay bartilmaameed u noqdeen dad ka mid ah dadyowga East **Africa** oo aaminsan

in dadkaan dilkooda lagu gaarayo darajo sare iyo in la heleyo lacag fara badan waxaa la yaab leh in qofkii arka qofka mid ah Albinos-ka ee ee wax gaarsiya ama dhaawaca waxay dadka ku howlan arrimaha Sixirka ay sheegey in isna wax helayo ama uu noqonayo Milyaneer waxaana dalka Tansaaniya ka socda olole dadka lagu wacyigelinayo oo ah inaan wax la gaarsiin islamarkaana dadka Albinos-ka yihiin dad la mid ah dadka kale ayna yihiin dadka Qaraafaadkaas aamisan kuwa aad u xun oo ku xadgudbey Bulshadaas



Dadka qaar ee ku nool East **Africa** ayaa aamisan in haddii ay dilaan qof Albinos ah ay helayaan caafimaad iyo in uu noqonaayo Milyaneer , waxaana la ogaaday in dad fara badan oo ka tirsan Albinos-ka laga waayey wadamadii ay ku noolaayeen markii la ogaaday in si xun lola dhaqmay waxaana warbixin la heley la ogaadey in Dad

BoqolaaL ah la diley islamarkaana Hilbahooda la jarjarey , qaarkoodna waxaa la sheegay in loo iib geeyo wadamo kale oo aaminsan arrimaha aan kor ku soo sheegnay. Sidoo kale markii dadkaasi la arko ayaa waxa soo weerara dadyow kale oo afduub kula dhaqaaqa. Gabar Guddoomiye ka ah Ururka ay ku mideysan yihiin dadka Albinos-ka ee ku nool dalka Kenya ayaa waxay sheegtay in sababaha ay ururkaasi u sameeyeen ay tahay sidii bulshada loogu wacyigelin lahaa in dadka Albinos-ka yihiin dadka sidaasi ku dhashay oo nolol ahaan la mid ah dad kale, waxay kaloo sheegtay in ay diiwaangeliyeen ilaa iyo dhowr Boqol oo qaba cudurkaasi oo ku nool dalka Kenya, waxayna ka codsatay Bulshada degan Kenya in dadkaasi xaquudooda lagu tuman isla markaana aan la faquuqin.



Dadka Albinos-ka ah jirkooda waxaa ka maqan Maadada sameysa Midabka Jirka , wuxuuna Awooda ka lumiyaa Jirka , waxayna inta badan yihiin marka ay Qoraxda joogaan in uusan aragoodu fiicneyn si waafi ahna aysan waxba u arki Karin, sidoo kale Taqaatiirta waxay sheegeen in Maqaarkooda uusan u adkeysan Karin Qaraxda ayna halis u yihiin Kansarka ku dhaca Maqaarka, sidoo kale Baarka kore ee indhaha ayaa cadaada, dadka qaar ayaa aaminsan in dadkaas ay qabaan Baras balse Taqaatiirta waxay

sheegeen in aysan qabin Baras balse uu yahay cudur qofka uu ku dhaco uuna ku bilowdo inta uu ku jira Ururka Hooyadii


Dalka Soomaaliya haddaan u soo laabano waxaa jira dad qaba cudurkaasi inkastoo aan la faquuqin, haddana waxaana ka cabsanayaa in waxyaabaha ka jira wadamada kale in ay saameyn ku yeeshaan, maadaama dalka aysan ka jirin



dowlad aad u adag, qaar ka mid ah dadkaasi Albinos-ka ah oo aan kula kulmay Magaalada Muqdisho ayaa ah kuwo xamaasha oo shaqeysta, isla markaana dadka soo dhex gala waxaana taasi ugu wacan iyadoo shacabka Soomaaliyeed yihiin dad Islaam ah , dadkaani ayaa aaminsan yihiin in ay yihiin dad la mid ah dadka kale , waxaase in laga sii digo mudan in fikirka ay aaminsan yihiin dadka ku nool

wadamada kale ee East **Africa** ay ugaarsiga ay ku hayaan dadka Albinos-ka ah ee ku nool wadamooda u soo weeciyaan Albinos-ka ku nool Soomaaliya maadaama xuduuda wadamada East **Africa** ay isa saaran yihiin oo si fudud lagu kala gudbi karo.

Marka laga reebo Soomaaliya wadamada kale ay ku nool yihiin dadka Albinos-ka waxaa ka bilaabatay isdiiwaangelin lagu sameeyo dadka Albinos-ka iyadoo Ururada ay dhisanayaan dadkaasi ay yihiin kuwo xaquuqdooda lagu ilaaliyo isla markaana ay kaalmo uga helaan Dowladda iyo waliba Ururada Dhinaca Bini'aadanimada ee ka jira beesha caalamka, sidaasi darteed waxaa



wanaagsanaan lahayd in dadka Albinos-ka ah ee Soomaaliya ku nool ay is uruursadaan oo ay sameystaan Urur u dooda xaquuqdooda, waxayna Soomaalidu tiraahdaa “Geeridii Galbeed laga sheego Gondahaaga ka fiiri”, wixii wadamadaas lagu soo arko waxaa laga yaabaa in Soomaaliya loo soo safriyo, waxaana jira in dadka qaba cudurka Juudaanka ay si aad

ah ugu dhiban yihiin Soomaaliya qaarkoodna waxay la kulmeen faquuqid aad u weyn, waxaana ugu wacan arrimahaas oo dhan iyadoo carruurta Soomaaliyeed aan lagu barbaarin in dadkaasi yihiin dad cudur caadi ah uu ku dhacay oo ay dadka la mid yihiin, balse waxaa laga dhaadhiciyey in ay yihiin dad aad u xun, waana midda keentay in carruurta Soomaaliyeed lagu cabsiiyo “Juudaanley ayaa timid, Carruurta ayay beerka laga baxaan”, waxaana taasi looga gudbi karaa iyadoo wacyigelin xoogan la sameeyo.



W/D Amiin Yuusuf hasaaro
E-Mail amiinkhasaaro@hotmail.com

Faafin: SomaliTalk.com | Sept 1, 2010